

Evening Dogri News Bulletin, 28 July 2024

इवनिंग डोगरी न्यूज़ बुलेटिन
समे-18:15 Hrs

Headlines

- 1 प्रधानमंत्री नरेंद्र मोदी होंरें मन की बात दी 112मीं किशत च यूनेस्को आस्सेआ भारत दे चराइदेव मैदान गी विश्व विरासती थाहरें दी सूचि च शामिल कीते जाने पर गर्व जताया ऐ।
- 2 पोलीस महानिदेशक आर.आर स्वैन होंरें आखेआ ऐ जे जम्मू डिविजन कन्नै लगदी अंतरराश्ट्री सीमा गी इंच-इंच सील कीता जाग।
- 3 रियासी ते पुंछ जिले च संदिग्ध आतंकवादिएं दी गतिविधि मगरा तलाशी अभियान शुरू कीते गेन।
- 4 पेरिस ओलंपिक्स च भारतीय निशानेबाज मनु भाकर नै इतिहास रचदे होई 10 मीटर एयर पिस्टल मुकाबले च कैहू दा तगमा जित्तेया ऐ।

<><><><><><>

PM-Mann ki Baat

प्रधानमंत्री नरेंद्र मोदी होंरें असम दे चराइदेव मैदान गी यूनेस्को दिएं विश्व धरोहर स्थले च शामिल कीते जाने गी बड़े गर्व दी गल्ल करार दिता ऐ। अज्ज आकाशवाणी पर अपने मन की बात कार्यक्रम राहें देशवासिं कन्नै अपने विचार सांझे करदे होई श्री मोदी होंरें आखेआ जे इनें थाहरें दी सूची च एहू भारत दी 43मीं थाहर होग ते एहू पूर्वोत्तर दा पैहला सांस्कृतिक विश्व धरोहर स्थल होग। पेरिस ओलंपिक बारै बोलदे होई प्रधानमंत्री मोदी होंरें आखेआ जे सब्बनें देशवासिं गी लोडचदा ऐ जे ओहू पेरिस ओलंपिक च भारत दी अगुवाई करने आले खड्डारिं दा हौसला बधान। श्री मोदी होंरें इंटरनेशनल पैथामेटिक्स ओलंपियाड च भारती विद्यार्थिं दे शानदार प्रदर्शन दा बी जिक्र कीता। प्रधानमंत्री होंरें अंतरराश्ट्री सतह दे इस मुकाबले च हिस्सा लैने आले भारती खड्डारिं कन्नै गल्लबात बी कीती। हत्थखड्डी उद्योग बारै बोलदे होई श्री मोदी होंरें 'उन्नति' नांs दे आप सहायता समूह कन्नै जुडने ते कपडें पर रंगें दा जादू फैलाने लेई हरियाणा दे रोहतक जिले दिएं ढाई सौ महिलाएं दी सराहना कीती। मुख च हत्थखड्डीं सरबंधी राश्ट्री ध्याडा अगले म्हीने दी 7 तरीक गी मनाया जाहग। इस बारै प्रधानमंत्री होंरें आखेआ।

देशे च नशीले पदार्थे दी कवैतु बारै बोलदे होई प्रधानमंत्री होंरें मानस नां दी विशेष पैहलकदमी दा जिक्र कीता ते आखेआ।

प्रधानमंत्री होंरें देशवासिं गी आखेआ जे 15 अगस्त आवै करदा ऐ ते ऐगती बी ओहू हर घर तिरंगा अभियान च पूरे जोश ते जज्वे कन्नै हिस्सा लैन। उनें आखेआ।

<><><><><><>

Jaishankar-Brinken

विदेश मंत्री डॉक्टर एस. जयशंकर होंरें कल लगने आली क्वाड मुखे दे विदेश मंत्रिं दी बैठक शा पैहले अज्ज टोक्यो च अमरीका दे विदेश मंत्री एंटनी ब्लिंकन हुंदे नै मलाटी कीती। इस दरान उनें इलाकाई ते कुल संसारी सतह दे केई सारे मामले पर गल्लबात कीती। सोशल मीडिया दी इक पोस्ट च डॉक्टर जयशंकर होंरें गलाया जे भारत ते अमरीका दा दपक्खी एजेंडा लगातार अगे बधा करदा ऐ ते ओहू क्वाड मुखे दे विदेश मंत्रिं दी बैठक च हिस्सा लैने लेई उत्सुक न।

<><><><><><>

J&K DGP

जम्मू-कश्मीर पुलस दे महानिदेशक आर.आर स्वैन होंरें आखेआ ऐ जे जम्मू डिविजन कन्नै लगदी अंतरराश्ट्रीय सीमा गी इंच-इंच सील कीता जाग। उनें आखेआ जे पुलस घुसपैठ दी गुजारश आली थाहरें ते जिमींदोज टनल दी संभावना आली थाहरें दी पंछान करा रदी ऐ। डीजीपी होंरें इक राश्ट्रीय सताचार पत्र कन्नै इंटरव्यू च आखेआ जे जम्मू-कश्मीर पुलस, नेई

थाहरें पर अपनी तैनाती गी बदा रदी ऐ ते विलेज डिफेंस ग्रुपें गी हथियारत ते सिखलाई देइयै सुरक्षा गी मजबूत कीता जा रदा ऐ। उनें दस्सेया जे जम्मू दी उच्चे प्हाड़ी लाहके च सेना गी 12 साल बाद परतिए तैनात कीता गेआ ऐ तां जे आतंकवादिगं गी चुनौती दित्ती जाई सकै। उनें आखेआ जे कश्मीर च हार खाने मगरा आतंकवादी हून जम्मू च सरगर्म होआ' रदे न, पर तौले गै उत्थुआं बी उंदा सफाया कीता जाग।

<><><><><><>

Reasi-Operation

रियासी जिले च कल दो आतंकवादिगं दी गतिविधि दी सूचना थोने मगरा सुरक्षाबलें इक बड्डा तलाशी अभियान शुरू कीता। आकाशवाणी संवाददाता मुजब रियासी जिले दी पौनी तहसील दे डडोआ गां च मुकामी लोकें आस्सेआ गां दे जंगली लाहके च दो संदिग्ध आतंकवादिगं गी दिक्खे जाने मगरा एहू अभियान चलाया गेआ। जम्मू-कश्मीर पुलस ते सी.आर.पी.एफ नै लाहके च सांझा अभियान शुरू कीते दा ऐ। मती जानकारी गी बलगेया जा'रदा ऐ।

<><><><><><>

CASO-Poonch

तोआई पुंछ दे केई लाहें च बी सुरक्षा बलें कल घेराबंदी ते तलाशी अभियान शुरू कीता। आकाशवाणी संवाददाता मुजब पुंछ दे मंगनाड लाहके च हथियारबंद लोकें दी संदिग्ध गतिविधि गी मुकामी सिविल लोकें आस्सेआ दिक्खे जाने मगरा मंगनाड, दरा, खियाड़ियां, झलास, सलोतरी ते फ्लोर गाएं च बड्डा तपाशी अभियान शुरू कीता गेआ ऐ। आखरी खबरां थोने तोड़ी अभियान चला'रदा हा। मती जानकारी गी बलगेया जा'रदा ऐ।

<><><><><><>

PDS

खुराक, सिविल सप्लाइज ते उपभोक्ता मामलें दे विभाग नै इक सूचना जारी करिए ई-श्रम च दर्जशुदा लोकें गी जिंदा राशन कार्ड नेई बने दा ऐ, अपने तहसील सप्लाई अफसरें या विभाग दे असिस्टेंट डरैक्टरें दे दफतरें च संपर्क करने लेई आखेआ ऐ तां जे उंदे नां, राशन कार्ड आली सूचि च दर्ज कीते जाई सकन। ई-श्रम च दर्जशुदा लोक पी.डी.एस राएं अनाज लैने दे हकदार न। जम्मू डिविजन च विभाग नै 47 ज्हार 297 नेहू लोकें कन्नै संपर्क कीता, इंदे चा 8 ज्हार 84 दे राशन कार्ड नेहे बने दे जेदे बाद 6 हजार 671 गी उंदे परिवार दे राशन कार्ड च शामिल कीता गेआ ते 665 गी नमें राशन कार्ड जारी कीते गो।

<><><><><><>

Paris Olympic

भारती निशानेबाज मनु भाकर होरें ओलंपिक्स च पैहला तगमा जित्ते आली महिला खड्डारी बनियै इतिहास रची दित्ता ऐ। महिलाएं दे 10 मीटर एयर पिस्टल फाइनल मुकाबले च उनें 221 इशारिया 7 दे स्कोर कन्नै कैहू दा तगमा अपने नां कीता। एहू पेरिस ओलंपिक च भारत दा पैहला तगमा बी ऐ। भाकर होरें कोरियाई निशानेबाज किम येजी ते ओ येन जिन खलाफ शानदार कौशल दा प्रदर्शन कीता। निशानेबाजी च भाकर हुंदी जित्त च इक महत्वपूर्ण उपलब्धि ऐ कीजे निशानेबाजी च भारत गी 12एं बरें परैत तगमा हासल होआ ऐ।

<><><><><><>

Prez. PM Manu Bhakar

राश्ट्रपति द्रौपदी मुर्मू ते प्रधानमंत्री नरेंद्र मोदी होरें पेरिस ओलंपिक्स च 10 मीटर एयर पिस्टल मुकाबले च कैहू दा तगमा जित्तियै भारत गी पैहला तगमा दोआने लेई मनु भाकर होरें गी मुबारकवाद दित्ती ऐ। राश्ट्रपति होरें आखेआ ऐ जे ओलंपिक्स च निशानेबाजी दे मुकाबले च तगमा जित्ते आली ओहू पैहली महिला न ते भारत गी उंदे उप्पर मान ऐ कीजे उंदी एहू उपलब्धि केई होर खड्डारिएं खास करियै महिलाएं गी प्रोत्साहित करदी रौहग। राश्ट्रपति होरें कामना कीती जे मनु भाकर होर

भविष्य च होर बी बड़ी उपलब्धियां अपने नां करना। प्रधानमंत्री मोदी होरें आखेआ ऐ जे एह भारत लेई इक ऐतिहासिक तगमा ऐ। उनें आखेआ जे एह इक शानदार उपलब्धि ऐ ते एह इस करियै बी मती खास ऐ कीजे भाकर होर भारत लेई निशानेबाजी च ओलंपिक पदक जितने आली पैहली महिलां बी बनी गेइयां न।

<><><><><><>

Rajouri-Sudan

राजौरी दे इक सरकारी अध्यापक तिलक राज सूदन होरें रीड दी हड्डी च जख्मीं होने दे बावजूद अज्ज इतिहास रचेया ऐ। उनें इक विशेष डिजाइन आली कार च हिमाचल प्रदेश ते लेह दी सड़कें पर 2 ज्हार 211 किलोमीटर दी ओह यात्रा पूरी कीती ऐ, जेदा उनें कदें सुखना दिक्खेआ हा। 40 साल शा बद् उम्मी आले तिलक राज होर इक सड़क हादसे मगरा शरीर दे हेठले हिस्से च संवेदनशीलता मुहाई बैठे दे न। उनें 10 साल तक्कर व्हील चेयर पर रौहने मगरा इक बारी प्रधानमंत्री मोदी हुंदी मन की बात गी सुनिए आत्मनिर्भर बनने बारै प्रेरणा हासिल कीती ते होरनें गी बी प्रेरणा देने दा संकल्प लैता। स्हाड़े राजौरी संवाददाता शक्ति पाल हुंदे कन्नै गल्लबात च तिलक राज सूदन होरें आखेआ।

<><><><><><>

Asia-Cup

महिलाएं दे एशिया कप टी-20 क्रिकेट च श्रीलंका दी दामबुला थाहर खेड्डे गेदे मैच गी श्रीलंका नै भारत गी 8 विकेटें कन्नै हराई दित्ता ऐ। 166 रन्जें दे लक्ष्य दा पिच्छा करदे होई श्रीलंका नै 18 ओवरें ते 4 गेंदें च छडी 2 किवटें दे नुकसान पर गै जित्त हासिल करी लैती। मेजवान टीम लेई हरशिता समाना विक्रमा नै नाबाद 69 रन्ज जिसले के कप्तान चमारी अट्टापट्टु नै 61 रन्ज बनाए।

<><><><><><>

Weather

मौसम विभाग नै जम्मू डिविजन च किश थाहरें कल्लै थमां बरखा च बाद्दा होने ते 31 जुलाई गी भारी बरखा पौने दा अनुमान लाया ऐ जेदे नतीजें च पस्सियां या गारा पौने दी संभावना बनी सकदी ऐ। 29 जुलाई मगरा दिन दे तापमान च काफी कमी बी औने दी मेद ऐ। जम्मू च अज्ज बद्दोबद्द तापमान 32 डिग्री सेल्यिस ते कल रातीं दा घट्टोघट्ट तापमान 25 अशारिया 3 डिग्री सेल्यिस दर्ज कीता गेआ। हवा च नमीं दी मात्रा 100 प्रतिशत रेही ते 10.8 एम.एम बरखा पेई।

<><><><><><>